

TILSYNSRAPPORT

Barnehagelova § 19 g

Tilrettelagt tilbud til barn med nedsett funksjonsevne

Askvoll kommune

Leikanger 29.oktober 2019

Sak 2019/11608

Innhald

Samandrag	3
1. Vår tilsynsmyndigheit	4
2. Om tilsynet med Askvoll kommune	4
3. Dei rettslege krava i barnehagelova § 19 g	5
4. Kommunen «skal sikre» at barn med nedsett funksjonsevne får eit eigna tilrettelagt barnehagetilbod	6
4.1 Rettsleg krav	6
4.2 Fylkesmannen si undersøking og vurdering	6
4.3 Fylkesmannen sin konklusjon	9
5. Kommunen skal følge sakshandsamingsreglane for enkeltvedtak i forvaltningslova	9
5.1 Rettslege krav	9
5.2 Fylkesmannen sine undersøking og vurdering	10
5.3 Fylkesmannen sin konklusjon	10
6. Frist for å rette brot på regelverket	10

Samandrag

Tilsyn etter barnehagelova § 19 g

Fylkesmannen har ført tilsyn med kommunen som barnehagemyndigheit, jf. barnehagelova § 9 første ledd. Temaet for tilsynet er kommunen si plikt etter barnehagelova § 19 g.

Formålet med tilsynet er å kontrollere at barnehagemyndigheita sikrar at barn med nedsett funksjonsevne får individuell tilrettelegging i barnehagen.

Askvoll kommune er valt ut etter ei vurdering av kor sannsynleg det er at kommunen ikkje oppfyller krava i barnehagelova § 19 g. Grunnlaget for vurderinga er tilbakemeldinga som blei gitt i Fylkesmannen si kartlegging i februar 2019. I kartlegginga gjekk det mellom anna fram at Askvoll kommune ikkje har informasjon om innhaldet i barnehagelova § 19 g på sine nettsider. Det gjekk også fram at Askvoll kommune ikkje har skrive vedtak etter barnehagelova § 19 g.

Denne førebelse tilsynsrapporten omhandlar våre funn knytt til temaet som er valt, på det tidspunktet tilsynet er gjennomført.

Funn

Fylkesmannen konkluderer med at Askvoll kommune ikkje oppfyller plikta til å sikre at barn med nedsett funksjonsevne får eit eigna tilrettelagt tilbod etter barnehagelova § 19 g.

Askvoll kommune må utarbeide eit system for å sikre at barn som har nedsett funksjonsevne får eit eigna tilrettelagt barnehagetilbod. Systemet må vere forsvarleg.

Vurderingane av kommunen sin praksis knytt til barnehagelova § 19 g, er basert på innsendt dokumentasjon.

Vegen vidare

Etter forvaltningslova § 16 fekk Askvoll kommune tilsendt førebels tilsynsrapport som inneheld varsel om pålegg. Askvoll kommune fekk høve til å uttale seg før endeleg tilsynsrapport. Frist for uttale vart 11. oktober 2019. Fylkesmannen har ikkje mottatt tilbakemelding frå kommunen. Rapporten får difor status som endeleg rapport.

1. Vår tilsynsmyndigheit

Fylkesmannen skal føre tilsyn med kommunen som barnehagemyndigheit, jf. barnehagelova § 9 første ledd. Tilsynet skal vere eit tilsyn med dei lovpålagde oppgåvene til kommunen, jf. kommunelova § 60 b.

Fylkesmannen sitt tilsyn skjer i samsvar med reglane i forvaltningslova. Tilsynet skal bygge på openheit og likebehandling, og skal kunne etterprøvast og gjennomførast på ein effektiv måte.

Fylkesmannen legg barnekonvensjonen til grunn ved tilsyn med kommunen som barnehagemyndigheit. Barnekonvensjonen går ved motstrid føre norsk lov. Artikkel 3 i konvensjonen er tydeleg på at *til beste for barn* skal leggjast til grunn som eit grunnleggande omsyn i alle avgjerder som vedkjem barn. Artikkel 23 i konvensjonen seier at eit barn som er psykisk eller fysisk funksjonshemma bør ha eit fullverdig og anstendig liv under forhold som sikrar verdigheit, fremjar sjølvstende og gjer det lettare for barnet å delta aktivt i samfunnet. Barnehagelova § 19 g er med på å sikre at artikkel 23 blir sett i verk, ved at barn blir sikra eit eigna individuelt tilrettelagt barnehagetilbod.

Fylkesmannen skal kontrollere om kommunen oppfyller plikta til å sikre at barn med nedsett funksjonsevne får eit eigna individuelt tilrettelagt barnehagetilbod etter barnehagelova § 19 g.

2. Om tilsynet med Askvoll kommune

Fylkesmannen har gjennomført skriftleg tilsyn etter barnehagelova med Askvoll kommune som barnehagemyndigheit. Barnehagemyndigheita i Askvoll kommune er lagt til kommunalsjef oppvekst.

Askvoll kommune er vald ut på grunnlag av kor sannsynleg det er at kommunen ikkje oppfyller krava i barnehagelova § 19 g. Grunnlaget for vurderinga er tilbakemeldinga som blei gitt i Fylkesmannen si kartlegging i februar 2019. I kartlegginga gjekk det mellom anna fram at Askvoll kommune ikkje har informasjon om innhaldet i barnehagelova § 19 g på sine nettsider. Det gjekk også fram at Askvoll kommune ikkje har skrive vedtak etter barnehagelova § 19 g.

Tilsynet med Askvoll kommune blei opna ved varsel om tilsyn 27. mai 2019. Kommunen sin frist til å legge fram dokumentasjon var 15. august 2019.

Følgjande dokument ligg til grunn for tilsynet:

- skriftleg orientering om kommunen sin praksis
- sakkunnig vurdering frå PPT
- vedtak om spesialpedagogisk hjelp

Fylkesmannen sine vurderingar og konklusjonar er baserte på den skriftlege dokumentasjonen vi har fått av kommunen.

Vi har undersøkt om kommunen som barnehagemyndigheit sikrar at barn med nedsett funksjonsevne får eit eigna individuelt tilrettelagt tilbod, jf. barnehagelova § 19 g, og at generelle sakshandsamingsreglar etter forvaltningslova er følgde.

3. Dei rettslege krava i barnehagelova § 19 g

Barnehagelova § 19 g første setning slår fast at:

«Kommunen skal sikre at barn med nedsatt funksjonsevne får et egnet individuelt tilrettelagt barnehagetilbud.»

Alle barn som går i barnehage har krav på eit tilbod i tråd med barnehagelova og rammeplan for barnehagar. Barn med nedsett funksjonsevne skal ha høve til å delta i det ordinære barnehagetilbodet på same måte som andre barn. Dersom barnet treng tilrettelegging for å kunne ta i bruk det ordinære barnehagetilbodet, har kommunen ei plikt til å gjere vedtak som sikrar at barnet får eit eigna individuelt tilrettelagt tilbod, jf. barnehagelova § 19 g. Føremålet med individuell tilrettelegging er å gi barn med særlege utfordringar lik moglegheit til å gjere seg nytte av barnehageplassen sin som andre barnehagebarn. Tilrettelegginga skal bli fastsett med utgangspunkt i barnet sine behov, og ressursane skal bli tildelt barnet i eit enkeltvedtak.

Omgrepet «nedsatt funksjonsevne» er ikkje definert i barnehagelova, men i forarbeidet blir det vist til at vilkåret omfattar fysiske, psykiske og kognitive funksjonsnedsettingar. Det må avgrensast mot bagatellmessige og forbigåande forhold som normalvariasjon i småbarnsalderen. Sentralt i denne vurderinga er om barnet har nedsett funksjonsevne av ein slik art at det hindrar barnet i å bruke barnehageplassen sin på lik linje med andre barn. Dersom kommunen kjem til at barnet har nedsett funksjonsevne, må det konkretiserast i kva situasjonar barnet treng tilrettelegging, når det treng tilrettelegging, og korleis tilrettelegginga skal bli utført.

Det er kommunen som barnehagemyndigheit som har ansvaret for å sikre at barn med nedsett funksjonsevne får eit tilrettelagt tilbod. Plikta gjeld for barn som er busett i kommunen, og som har barnehageplass.

Barnehagelova § 19 g andre setning seier:

Plikten til tilrettelegging omfattar ikkje tiltak som innebærer en uforholdsmessig byrde for kommunen. Ved vurderingen av om tilretteleggingen innebærer en uforholdsmessig byrde, skal det særlig legges vekt på tilretteleggingens effekt for å nedbygge funksjonshemmende barrierer, de nødvendige kostnadene ved tilretteleggingen og virksomhetens ressurser.

Vilkåret «uforholdsmessig byrde» handlar om kommunen si plikt til å leggje til rette tilbodet i ein bestemt barnehage. I forarbeida er det framheva at dette unntaket er meint som ein snever sikkerheitsventil, og at foreldre med barn med nedsett funksjonsevne i utgangspunktet har rett til å velje barnehageplass på lik linje med andre foreldre.

Dette tilseier at kommunen sin økonomi ikkje kan vere eit omsyn i vurderinga av om tilrettelegginga skal bli gitt eller kva omfang den skal ha. Kommunen kan difor ikkje avslå søknader med grunngjeving i at dei ikkje har økonomiske ressursar.

Det går fram av barnehagelova § 19 g andre ledd at det er kommunen som barnehagemyndigheit som skal gjere vedtak etter føresegna.

4. Kommunen «skal sikre» at barn med nedsett funksjonsevne får eit eigna tilrettelagt barnehagetilbod

4.1 Rettsleg krav

Barnehagelova § 19 g krev at kommunane «skal sikre» at barn som har nedsett funksjonsevne får eit eigna tilrettelagt barnehagetilbod. Vilkårer «skal sikre» kan tolkast slik at kommunen må ha eit system for å sjå til at dei oppfyller plikta dei har etter føresegna. Dette systemet må vere forsvarleg.

Regelverket gjev ikkje føringar for korleis eit system må vere utforma for at det skal kunne reknast for å vere forsvarleg. Ofte vil lokale tilhøve vere førande for korleis systemet bør utformast. Eit system som kan reknast for å vere forsvarleg i ein kommune er derfor ikkje automatisk forsvarleg i ein annan kommune. Kommunen står dermed fritt til å utforme sitt eige system, basert på lokale tilhøve, så lenge det kan reknast for å vere forsvarleg. For å sikre at eit system er forsvarleg er det ofte nødvendig å utarbeide rutinar.

Systemet må famne om alle steg i prosessen fram mot å sikre at barnet får eit eigna tilrettelagt barnehagetilbod. Dette vil mellom anna kunne gjelde å formidle informasjon om regelverket til relevante aktørar, og sørge for at det er kjent korleis behov om tilrettelegging kan meldast inn til kommunen.

Når kommunen blir kjent med at eit barn kan ha rett på tilrettelegging, uavhengig av om det er fanga opp av kommunen sin rutine eller ved melding, må dei sørge for å innhente tilstrekkeleg med opplysingar til å vurdere om vilkåra i § 19 g er oppfylt.

For at kommunen skal oppfylle plikta til å sikre at barn med nedsett funksjonsevne får eit individuelt tilrettelagt barnehagetilbod, må det gjerast vedtak, jf. barnehagelova § 19 g siste setning. Vedtaka må synleggjere at kommunen har gjort ei korrekt vurdering av vilkåra i § 19 g og i tillegg vere i tråd med reglane i forvaltningslova. Systemet til kommunen bør også famne om dette steget av prosessen. Det same gjeld oppfølginga av om tilrettelegginga blir gjennomført i tråd med vedtaket.

På denne bakgrunn skal Fylkesmannen i dette tilsynet undersøke om kommunen har sannsynleggjort at dei har eit forsvarleg system på området, som sikrar at plikta etter barnehagelova § 19 g blir oppfylt.

4.2 Fylkesmannen si undersøking og vurdering

Rutine

Kommunalsjef oppvekst skriv i brev 19. august 2019 at kommunen ikkje har teke innover seg skiljet mellom § 19 a og § 19 g, som kom då barnehagelova vart endra i 2016. Han er likevel overtydd om at alle barn i Askvoll kommune, som har hatt behov for tilbod etter begge føresegnene, har fått dette.

Fylkesmannen skal under tilsynet ikkje gjere ei konkret vurdering av om barna i Askvoll kommune har fått dekkja behova dei eventuelt har for tilrettelegging i barnehagen. Tema for tilsynet er om kommunen sikrar at barna får eit tilrettelagt tilbod i tråd med barnehagelova § 19 g. Dette må kommunen sikre på systemnivå.

Når kommunen skriv at dei ikkje har praksis for å skilje mellom § 19 a og § 19 g, tilseier dette at kommunen ikkje har ei kjend og praktisert rutine for korleis dei skal sikre at barn sine rettar etter § 19 g blir ivaretekne.

I den grad kommunen har ei rutine for å gje barn tilrettelegging i barnehagen reknar vi det som sannsynleg at rutinane er knytt til barnehagelova § 19 a. Dei to føresegnene gjev barna ulike rettar. Vilkåra for å ha rett til spesialpedagogisk hjelp og rett til tilrettelegging er også ulike. Dette medfører at kommunen må gjere ulike vurderingar etter dei to føresegnene, og at kommunen må innhente ulike typar opplysingar for å kunne vurdere om barnet har ein rett etter § 19 g, enn etter § 19 a.

Desse tilhøva gjer det nødvendig at kommunen har to ulike rutinar, som kvar for seg sikrar at barn får den retten dei har krav på, etter begge føresegnene. Ei rutine for vurdering av vilkåra etter § 19 a vil ikkje i tilstrekkeleg grad sikre at kommunen fangar opp barn med tilretteleggingsbehov etter § 19 g, spesielt fordi barn som treng tilrettelegging ikkje alltid vil ha behov for spesialpedagogisk hjelp.

Med bakgrunn i dette konkluderer vi med at med at kommunen ikkje har ei god nok rutine for å sikre eit tilrettelagt tilbod til barn med nedsett funksjonsevne etter barnehagelova § 19 g.

Informasjon

Kommunalsjef oppvekst skriv vidare at informasjonen som kjem fram i kartlegginga frå februar 2019 er korrekt, og at kommunen ikkje har informasjon om barnehagelova § 19 g på sine nettsider.

Som ein del av plikta til å sikre at barn får dekkja sitt behov for tilrettelegging etter § 19 g, bør kommunen ha eit system for å spreie informasjon om regelverket til dei som kan ha behov for tilrettelegging. Det bør også gjerast kjent at behovet kan meldast inn til kommunen.

At dei føresette og andre har kjennskap til regelverket bidrar til at kommunen kan sikre at dei fangar opp barn med tilretteleggingsbehov i kommunen.

Informasjon om regelverket på nettsidene er eit eksempel på korleis kommunen kan gjere informasjon om barnehagelova § 19 g kjent. Det er derimot ikkje eit krav, og heller ikkje den einaste måten kommunen kan sikre at regelverket blir gjort kjent for dei som har behov for dette.

Kommunalsjefen skriv vidare at kommunen, fram til for nokre månadar sidan, generelt sett ikkje har hatt særleg merksemd på å informere om barnehagelova § 19 g. Kommunen vurderer eigen praksis slik at dei har brote lova. Som følge av dette ser kommunen eit behov for å få på plass eit informasjonsopplegg, både på kommunen sine nettsider, i barnehagane og ved søknad om inntak til barnehage. Eit slikt opplegg er derimot ikkje til stades i dag.

Når kommunen ikkje har gjeve informasjon om regelverket, mellom anna til føresette og barnehagane, kan ein ikkje sjå bort frå at det er barnehagebarn i kommunen som ikkje har fått den tilrettelegginga dei har behov for og rett til etter § 19 g. Kommunen må ha eit system for å sørge for at barna som kan ha behov for tilrettelegging blir fanga opp, også i dei tilfella dei ikkje får søknad eller melding om behov. Dette ansvaret ligg til kommunen og kan ikkje overførast til verken føresette eller barnehagane.

Fylkesmannen har etter dette kome til at Askvoll kommune ikkje har eit system for å informere om rettane i barnehagelova § 19 for å fange opp barn som har behov for tilrettelegging, som er forsvarleg.

Vedtak

Kommunen må gjere vedtak både dersom dei kjem til at eit barn med nedsett funksjonsevne har rett til tilrettelegging etter § 19 g, og i dei tilfella dei kjem til at barnet ikkje har ein slik rett. Vurderinga til kommunen må ta utgangspunkt i vilkåra i barnehagelova § 19 g, og samtidig gjerast i tråd med reglane for enkeltvedtak forvaltningslova.

Kommunalsjefen skriv at kommunen ikkje har gjort vedtak etter barnehagelova § 19 g, men berre etter § 19 a. Han legg til grunn at alle barn som har rett til tilrettelegging etter § 19 g, har fått dette som ein del av vedtak etter barnehagelova § 19 a. Kommunalsjefen viser vidare til at kommunen har vore opptatt av å sjå heile barnet, og kommunen har gjort eit felles vedtak etter barnehagelova § 19 a, om både spesialpedagogisk hjelp og tilrettelegging, for dei barna som har hatt behov for dette.

Først vil vi peike på at ei slik løysing er uheldig fordi det vil vere ein risiko for at barn som ikkje treng spesialpedagogisk hjelp, men som treng tilrettelegging, ikkje blir fanga opp eller vurdert når kommunen tek utgangspunkt i § 19 a.

Dei to føresegnene gjev barna ulike rettar. Vilkåra for å ha rett til spesialpedagogisk hjelp og vilkåra for å ha rett til tilrettelegging er også ulike. Dette medfører at kommunen må gjere ulike vurderingar etter dei to føresegnene, og må innhente andre opplysingar for å kunne vurdere om barnet har ein rett etter § 19 g, enn kva som gjeld for § 19 a. Føresegnene påfører også kommunen ulike plikter.

At det blir gjort eit eige vedtak etter § 19 g er ein rett barnet har, isolert sett. Det er dermed ikkje tilstrekkeleg at barnet, for eksempel gjennom eit § 19 a vedtak, får dekkja behovet for tilrettelegging. Enkeltvedtaket skal grunnleggjast ut frå vurderingane som blir gjort etter vilkåra i § 19 g, og skal gjere det mogleg for føresette å forstå kvifor kommunen meiner barnet har eller ikkje har rett på tilrettelegging. Dersom barnet har rett på tilrettelegging skal vedtaket innehalde detaljerte opplysingar om omfang og organisering. Dette vil gjere føresette i stand til å forstå innhaldet i retten som er tildelt, og vurdere om dei skal klage på vedtaket.

Med bakgrunn i at kommunen ikkje gjer vedtak med heimel i barnehagelova § 19 g har vi kome til at kommunen ikkje sikrar at barn med nedsett funksjonsevne får eit egna tilrettelagt barnehagetilbod.

Oppfølging av at vedtaka blir gjennomført

Kommunen si plikt etter barnehagelova § 19 g omfattar også ei plikt til å følgje opp om tilrettelegginga blir gjennomført i tråd med vedtaket. Fordi kommunen ikkje gjer vedtak etter barnehagelova § 19 g reknar Fylkesmannen det for å være sannsynleg at kommunen heller ikkje har eit system for følgje opp at tilrettelegginga blir gjennomført i tråd med vedtaket, som er forsvarleg.

4.3 Fylkesmannen sin konklusjon

Fylkesmannen har kome til at Askvoll kommune ikkje har sannsynleggjort at dei har eit forsvarleg system for å sikre at barn som har nedsett funksjonsevne får eit eigna tilrettelagt barnehagetilbod, jf. barnehagelova § 19 g.

5. Kommunen skal følge sakshandsamingsreglane for enkeltvedtak i forvaltningslova

5.1 Rettslege krav

Når kommunen skal gjere vedtak om tilrettelegging, må dei følge føresegnene i forvaltningslova. Dette set mellom anna krav til at vedtaket er grunngeve, og at saka skal vere så godt opplyst som mogleg. Grunngevinga skal setje parten i stand til å forstå vedtaket. Dette set krav til at kommunen, på ein god og forståeleg måte, viser korleis dei har vurdert lova sine vilkår. Gode vurderingar krev at kommunen får saka godt opplyst. Vedtaka til kommunen må også oppfylle dei formelle krava til enkeltvedtak i forvaltningslova.

Krav til å opplyse saka

Kommunen «skal påse at saken er så godt opplyst som mulig før vedtak treffes», jf. forvaltningslova § 17. Å få saka godt opplyst, er nødvendig for at kommunen skal kunne gjere dei vurderingane som barnehagelova § 19 g krev.

Ettersom behovet til det enkelte barn varierer, vil også undersøkingane kommunen må gjere variere, for å få saka så godt opplyst som mogleg. Nokre saker krev grundigare undersøkingar enn andre. Til dømes vil uttale frå barnehagen, PPT eller kommune- og spesialisthelsetenesta i nokre tilfelle måtte innhentast for å opplyse saka. Ei melding om behovet for tilrettelegging frå foreldre eller barnehage vil og vere med på å gi opplysningar i saka.

Krav til grunngeving

I forvaltningslova § 24 er det stilt krav om at enkeltvedtak «skal grunngis». Kravet må sjåast saman med forvaltningslova § 25, som har minimumsreglar om kva grunngevinga skal innehalde. Formålet med kravet til grunngeving er mellom anna at mottakaren av vedtaket blir sett i stand til å forstå kva vedtaket er basert på og inneber, og om vedtaket er korrekt.

Eit minimum for at vedtaket etter barnehagelova § 19 g skal etterleve kravet til grunngeving er for det første at kommunen vurderer funksjonsevna til barnet. Dersom kommunen kjem til at barnet har «nedsett funksjonsevne» i barnehagen, må kommunen identifisere kva som er til hinder for at barnet kan ta i bruk barnehageplassen sin på same måte som andre barn, og vurdere kva for tiltak som må til for å bygge ned desse barrierane. Kommunen må vurdere kva som vil være eigna tiltak for akkurat dette barnet. Tiltaka må bli vurdert opp mot barnets funksjonsnedsetting og behov. Kommunen må ta utgangspunkt i barnet sine individuelle behov og konkretisere i kva situasjonar barnet treng tilrettelegging, når det treng tilrettelegging og korleis tilrettelegginga skal bli utført.

Formelle krav

Etter forvaltningslova § 11 a er utgangspunktet at kommunen skal førebu og avgjere saka utan ugrunna opphald. Kva som kan reknast som forsvarleg sakshandsamingstid vil mellom anna kunne variere med saka si art og omfang.

Kommunen skal, så snart som råd, gje melding om vedtaket til partane, jf. forvaltningslova § 27 første ledd.

Det følgjer vidare av forvaltningslova § 27 tredje ledd at underretninga skal gi opplysningar om «klageadgang, klagefrist, klageinstans og nærmare framgangsmåte ved klage». Kommunen må opplyse om at klagefristen er tre veker frå då parten fekk vedtaket, at klagen skal sendast til kommunen, og kven som er klageinstans.

Partane i ei sak har rett til å gjere seg kjend med dokumenta i saka, jf. forvaltningslova § 18. Enkeltvedtaket skal innehalde opplysningar om retten til innsyn og unntaka frå den, jf. forvaltningslova § 27.

Nærmare reglar for saksbehandling ved klage går fram av forvaltningslova §§ 27–32.

5.2 Fylkesmannen sine undersøking og vurdering

I kartlegginga Fylkesmannen frå februar 2019 kjem det fram at kommunen ikkje gjer vedtak etter barnehagelova § 19 g. Kommunen stadfestar dette i svar til vårt varsel, 19. august 2019. Vurderinga av om kommunen følgjer reglane for enkeltvedtak etter forvaltningslova må knytast til konkrete enkeltvedtak gjort med heimel i barnehagelova § 19 g. Vi har derfor ikkje grunnlag for å vurdere om kommunen følgjer reglane for enkeltvedtak i forvaltningslova knytt til vedtak etter føresegna.

5.3 Fylkesmannen sin konklusjon

Fylkesmannen har ikkje grunnlag for å vurdere om kommunen følgjer reglane for enkeltvedtak i forvaltningslova, knytt til barnehagelova § 19 g.

6. Frist for å rette brot på regelverket

Fylkesmannen har konstatert brot på regelverket i barnehagelova § 19 g.

I rapporten får Askvoll kommune frist til å rette brot på regelverket jf. kommunelova § 60 d.

Frist for retting er 1. desember 2019.

Dersom forholdet ikkje er retta innan den fastsette fristen, kan Fylkesmannen vedta pålegg om retting jf. kommunelova § 60 d. Eit eventuelt pålegg om retting vil ha status som enkeltvedtak og kan klagast på, jf. forvaltningslova kapittel VI. Kommunen har rett til innsyn i saksdokumenta, jf. forvaltningslova § 18.

Askvoll kommune må rette følgjande brot på regelverket:

- 1 Kommunen må utarbeide rutinar, for alle steg i prosessen, som fastset korleis kommunen skal gå fram for å oppfylle sine plikter etter § 19 g.
 - Kommunen må formidle informasjon om regelverket til relevante aktørar og sørge for at det blir kjent korleis behov om tilrettelegging kan meldast inn til kommunen.
 - Kommunen må sørge for å fange opp barn som kan ha rett på tilrettelegging.

- Kommunen må sørge for følge opp om tilrettelegginga er blir gjennomført i tråd med vedtaket.
- 2 Kommunen må vurdere om barnet har nedsett funksjonsevne og gjere vedtak etter §19 g.
- 3 Kommunen må gjere vedtak etter § 19 g i tråd med forvaltningslova.

Berit Rygg

tilsynsleiar

Fylkesmannen i Vestland

Oda Eikeland Myrnes

rådgjevar

Astrid Terese Aam

seniorrådgjevar